


Camchuart i gCiarraí

Ceist 1

Beidh tú ag féachaint ar ball ar thuairisc faoi chamchuart neamhghnách i gContae Chiarraí.



Féach ar ghearróg ón mír **gan** fuaim. Cad é ábhar na míre, dar leat? Scríobh síos tuairisc ghearr bunaithe ar a bhfeiceann tú ón mír. Bain úsáid as do shamhlaíocht!

Cad a bhí ag an duine in aice leat?

Ceist 2

Gan féachaint ar an mír go fóill, an féidir leat féin agus an duine in aice leat Gaeilge a chur ar na focail agus na frásaí seo?

on the roads of the peninsula	_____
more than €30,000 was collected	_____
two charities	_____
the lungs	_____
donor	_____
transplant	_____
heartbreak	_____
dust	_____
old, elderly	_____
working group	_____

Féach ar an tuairisc le feiceáil an raibh an ceart agaibh.

Ceist 3

Féach ar an tuairisc arís agus breac síos na slite a bhfuil sí difriúil ón tuairisc a scríobh tú féin ar an mír, faoi **Ceist 1**.

Ceist 4

Cúrsaí teanga agus ceisteanna tuisceana

1. Cén chanúint atá ag na cainteoirí sa mhír? Aimsigh cúpla sampla ón mír a chuireann an chanúint sin in iúl.

VIFAX 29 Samhain 2018
Ardleibhéal

2. Bhain cuid de na cainteoirí úsáid as focail Bhéarla. Cén fáth, dar leat? Cén Ghaeilge atá ar na focail sin – *donor, tractor, alright*?
3. Ar thuig tú na cainteoirí ar fad? Cén fáth?
4. Samhlaigh go bhfuil tú ag caint le duine agus nach dtuigeann tú mórán atá á rá acu. Cad iad na frásaí a d'úsáidfeá chun do mhíthuiscint a chur in iúl?

Ceist 5

'...bailíodh...' agus '...nach bhfacthas...'

Seo thíos an fhoirm cheisteach den saorbhriathar san aimsir chaite – na briathra neamhrialta.

an ndúradh...?	<u>dúradh</u> _____
ar rugadh...?	_____
ar chualathas...?	_____
an ndearnadh...?	_____
an bhfuarthas...?	_____
an bhfacthas...?	_____
ar itheadh...?	_____
ar tugadh...?	_____
ar thángthas...?	_____

1. Breac síos gnáthfhoirm an tsaorbhriathair san aimsir chaite i ngach cás.
2. Cuir gach sampla den saorbhriathar a bhreacann tú síos in abairtí lena mbrí a léiriú.

Ceist 6

Pléigh na ceistanna seo leis an duine in aice leat, nó le do ghrúpa.

1. An ndearna tú féin aon rud neamhghnách riamh ar son carthanachta? Cad a bhí ann?
2. Cén fáth nach féidir leis an Stát go leor airgid a chur ar fáil do sheirbhísí cúraim leighis sa tír, dar leat?
3. Déan cur síos ar Chorca Dhuibhne, ón méid a fheiceann tú sa mhír.

Treoracha agus Freagraí

Ceist 1

Cuir an mhír ar siúl nóiméad amháin nó mar sin tar éis thús na míre. Tá na híomhánna is fearr ag an bpointe seo. Bí cinnte an fhuaim a mhúchadh. Iarr ar na foghlaimeoirí cuntas gearr a scríobh faoi ábhar na míre, dar leo féin. Tabhair deis dóibh na tuairimí a bhí acu a phlé leis an duine in aice leo. Pléigh tuairimí an ranga ar fad ansin.

Ceist 2

on the roads of the peninsula	<i>ar bhóithre na leithinse</i>
more than €30,000 was collected	<i>baillíodh breis agus €30,000</i>
two charities	<i>dhá charthanacht</i>
the lungs	<i>na scamhóga</i>
donor	<i>deontóir</i>
transplant	<i>trasphlandú</i>
heartbreak	<i>briseadh croí</i>
dust	<i>smúit</i>
old, elderly	<i>cnagaosta</i>
working group	<i>meitheal</i>

Ceist 3

Féach an script.

Ceist 4

1. Tá canúint na Mumhan ag na cainteoirí. Samplaí den chanúint sin – *thar n-ais, ar an dtrasphlandú, a dhein, bóithre na dúthaí, bhíodar, thosnaíos, féinig, ag tarrac.*
2. Tá an Ghaeilge faoi thionchar an Bhéarla go mór. Nuair a bhíonn dátheangachas i gceist is minic teanga amháin níos láidre ná an ceann eile, sa chás seo an Béarla – *donor - deontóir, tractor - tarracóir, alright – ceart go leor, go breá.*
3. Tuairimíocht atá i gceist anseo.
4. 'Tá brón orm, ní thuigim thú'. 'Gabh mo leithscéil, abair arís é'. 'Abair sin arís, le do thoil'. 'Ar mhiste leat é sin a rá arís?'. 'An féidir leat labhairt níos moille?'

Ceist 5

an ndúradh...?	dúradh
ar rugadh...?	rugadh
ar chualathas...?	chualathas
an ndearnadh...?	rinneadh
an bhfuarthas...?	fuarthas
an bhfacthas...?	chonacthas
ar itheadh...?	itheadh
ar tugadh...?	tugadh
ar thángthas...?	thángthas

Ceist 6

Is féidir gach beirt a chur ag déanamh an phlé seo agus ansin cuid de na ceistanna a phlé leis an rang iomlán.

Siún Nic Gearailt

Fáilte romhaibh thar n-ais. Anois radharc ba ea é seo nach bhfacthas a leithéid riamh roimhe sin i gCorca Dhuibhne. Suas le 150 tarracóir i mbun camchuarite ar bhóithre na leithinse. Tráthnóna inné a bhí sé ar bun agus bailíodh breis agus €30,000 do dhá charthanacht – Ionad Seanóirí¹ sa Daingean agus Cumann Fiobróis Scamhóige na hÉireann.

Seán Mac an tSíthigh

Níl ach dhá bhliain ann ó bhí John O'Sullivan i mbaol báis, na scamhóga ag teip de dheasca fiobróise. Ach, ar deireadh tháinig an glaoch go raibh deontóir aimsithe. Nuair a dhúisigh sé tar éis na hobráide, dúradh leis go raibh rath ar an trasphlandú².

John O'Sullivan, Coiste Chamchuart na dTarracóirí

Cheap a lán daoine go mb'fhéidir gurbh é an *donor* a tháinig isteach i mo cheann ar dtús ach ní hea, ach clann an *donor*, a dhein³ an cinneadh an mhaidin sin agus briseadh croí orthu.

Seán Mac an tSíthigh

Inné, tháinig feirmeoirí Chorca Dhuibhne le chéile, suas le 150 tarracóir, smúit á baint as bóithre na dúthaí⁴ agus airgead á bhailiú acu de Chumann Fiobróis Scamhóige na hÉireann, ach chomh maith leis sin do Ghairdín Mhuire, ionad cúraim do sheandaoine sa Daingean.

Séamus Ó Dubháin, Coiste Chamchuart na dTarracóirí

Bhuel bhí sí i nGairdín Mhuire timpeall dhá bhliain go leith sular bhfuair sí bás agus bhíodar an-mhaith di ... uaithi⁵. Sin é an fáth gur thosnaíos⁶ an rud seo.

Seán Mac an tSíthigh

Bhí tarracóirí nua ann agus a thuilleadh acu cnagaosta go maith.

Muiris Chosaí Mac Gearailt, Tiománaí Massey Ferguson 135

Seán: Cén saghas *tractor* í sin?

Muiris: Ah tá sí *alright*. Ferguson... cad is dóigh leat? An í caoch atá tú?

Seán: Cad é an saghas *speed* atá aici sin?

Muiris: Dhéanfadh sí cúig nó sé de mhílte san uair an chloig.

Seán: An dtógfaidh sé i bhfad ort gabháil timpeall?

Muiris: Oh tógfaidh sé dhá lá. Tráthnóna amárach b'fhéidir go mbeimis críochnaithe.

Seán: Cad as atá na feirmeoirí tagtha?

Tiománaí 1: Déanaim amach go bhfuil siad ó ar fud an chontae ar fad. Tá siad ag dul ó Lios Tuathail is na háiteanna sin chomh maith, ó ar fud na háite.

Tiománaí 2: D'fhágamar timpeall a haon is ní fheadair cén t-am anois é.

Seán: Níl aon deabhadh oraibh?

Tiománaí 2: Níl aon deabhadh in aon chor. Níl aon deabhadh.

¹ *seanadóirí* a dúradh

² *ar an dtrasplandú* a dúradh

³ *rinne* an leagan caighdeánach

⁴ *na dúiche* an leagan caighdeánach

⁵ Ní léir céard go díreach a dúradh

⁶ *thosaigh mé* an leagan caighdeánach

Seán Mac an tSíthigh

Breis agus 20 míle bóthair a chuireadar díobh⁷ ó Lios Póil siar tríd an Daingean⁸, as sin go Ceann Trá, Baile an Éanaigh agus isteach an Daingean arís. Bailíodh os cionn €30,000.

Joan Uí Shúilleabhain, Lios Póil

Murach an fhéile féin⁹, ní fhaigheann siad aon deontas ón Rialtas nó aon rud mar sin. Sin é pobal Lios Póil, an tábacht a chuireann siad isteach sa phobal féinig¹⁰. Tugann gach aon duine cabhair dá chéile. Sin iad muintir Lios Póil.

Seán Mac an tSíthigh

Dhá uair an chloig a thóg sé orthu an cúrsa a chur díobh. Meitheal na dtarracóirí, agus iad ag tarrac¹¹ le chéile.

Seán Mac an tSíthigh, TG4, Corca Dhuibhne.

⁷ *díobh* a dúradh

⁸ *tríd an nDaingean* a dúradh

⁹ Ní fios céard go díreach a dúradh anseo

¹⁰ *féin* an leagan caighdeánach

¹¹ *ag tarraingt* an leagan caighdeánach